

21 FEB 1999

MAHATHIR LANCAR KEJOHANAN GOLF DAN EDISI KHAS PERDANA

KUALA LUMPUR, 21 Feb (Bernama) -- Perdana Menteri Datuk Seri Dr Mahathir Mohamad hari ini melancarkan kejohanan golf amatur terbesar di negara ini, Thommo Titanium Golf Challenge '99, di sini.

Dr Mahathir secara rasmi memukul bola kejohanan di Kuala Lumpur Golf and Country Club sebelum mempertontonkan Edisi Khas Proton Perdana dan melekatkan lambang Golf Piala Dunia di pengadang depan kenderaan itu.

Turut hadir pada perasmian itu ialah Menteri Kebudayaan, Kesenian dan Pelancongan Datuk Seri Sabbaruddin Chik dan Peter Thomson, juara lima kali Terbuka Britain, yang terbang khusus untuk menghadiri majlis itu.

Kejohanan itu, yang akan diadakan di 60 kelab golf di seluruh negara bertujuan meningkatkan mutu sukan golf dan menggalakkan masyarakat golf tempatan menyokong penggunaan bola golf Thommo buatan Malaysia yang direka Thomson.

Para penganjur juga berkata dengan kira-kira 120 pemain golf untuk satu pusingan, kejohanan itu akan menarik penyertaan kira-kira 7,200 pemain amatur.

Pengerusi Edaran Otomobil Nasional Berhad Tan Sri Datuk Wira Salleh Sulong berkata EON membantu menjayakan acara Golf Piala Dunia Malaysia '99 dengan menawarkan sebuah Proton Perdana kepada pemain yang berjaya mencipta hole-in-one dalam kejohanan itu.

-- BERNAMA

GM RON